



# RUDAR

*Puno sreće i poslovnog uspjeha u 2021. godini!*  
**SRETNNO!**

NA DAN RUDARA U RAD PUŠTEN DIO TRANSPORTNOG SISTEMA

**INVESTICIJA VRIJEDNA  
PREKO 50 MILIONA KM**

U POVODU DANA RUDARA

**ODRŽANA SVEČANA SJEDNICA  
UPRAVE DRUŠTVA I DODIJELJENA  
PRIZNANJA LAUREATIMA ZA  
2020. GODINU**

PROIZVODNO – FINANSIJSKI REZULTATI U 2020. GODINI  
ISPUNJENI PLANOVİ NA PROIZVODNJI  
UGLJA I OSTVARENI IZNADPLANSKI  
REZULTATI NA PROIZVODNJI OTKRIVKE,  
FINANSIJSKA DOBIT OKO 2 MILIONA KM





SVEČANA SJEDNICA UPRAVE DRUŠTVA POVODOM 21. DECEMBRA DANA RUDARA BIH

## I OVE GODINE UZ POZITIVNE PROIZVODNO – FINANSIJSKE REZULTATE PROSLAVLJEN DAN RUDARA U BANOVIĆIMA

Povodom 21. decembra Dana rudara BiH održana je Svečana sjednica Uprave RMU „Banovići“ d.d. Banovići na kojoj su rezimirani poslovni rezultati u godini na izmaku, naglašeni prioriteti za slijedeću godinu i dodijeljena priznanja zaslužnim članovima Društva u 2020. godini.

Sjednica je ove godine zbog nepovoljne situacije održana sa ograničenim brojem prisutnih gostiju uz poštovanje svih epidemioloških mjera. Svečanost povodom jednog od najvećih praznika kojeg slave građani Banovića ove godine okupila je i veliki broj predstavnika kantonalnih i federalnih nivoa vlasti,



predstavnik iz oblasti rudarstva, privrednog i javnog života. Između ostalih, gost Svečane akademije bio je i premijer Vlade FBiH Fadil Novalić, ministar energije, rudarstva i industrije Nermin Džindić, predsjednik Skupštine TK Žarko Vujović, premijer TK Denijal Tulumović sa ministrima, direktor JP „Elektroprivreda BiH“ d.d. Sarajevo, te veliki broj poslovnih partnera.



Sjednica je započela polaganjem cvijeća na Centralnom spomen obilježju, a nakon intoniranja himne i uvodnih pozdrava prisutnima je prikazano video predstavljanje najbitnijih projekata i događaja koji su obilježili 2020. godinu u Rudniku, ali i uloga i značaj rudara u ovom gradu.

U nastavku programa gostima se obratio v.d. direktor Društva Fadil Kudumović, koji je u svom obraćanju istakao da je Rudnik veoma blizu ispunjenja godišnjih planova i da su u ovoj krizi sve aktivnosti usmjerene prema proizvodnji i dodatnoj stabilizaciji Rudnika. Zahvalio se svima na pomoći u proteklom periodu, posebno Vladi FBiH i Resornom ministarstvu.



- Ovo je idealna prilika da prezentiramo urađeno u toku ove godine, da se osvrnemo iza sebe i utvrdimo koliko smo uspjeli u svojim ciljevima. Poslovnu godinu završit ćemo sa oko 1.600.000 tona separisanog uglja i realizacijom otkrivke sa oko 12.500.000 tona čvrste mase. Na osnovu ostvarenih proizvodnih rezultata

preduzeće će poslovati sa dobiti od oko 2 miliona KM. Međutim, ovakav rezultat još je značajniji uzme li se u obzir da je početkom godine povećan topli obrok i plata radnika u skladu sa Kolektivnim ugovorom i to topli obrok sa 10 KM na 14 KM, a plata za oko 8%, za koje Planom nisu bila obezbijeđena sredstva. Pored održavanja stabilnosti proizvodnje i elektroenergetskog sektora naša osnovna obaveza su banovićki rudari za koje nastojimo osigurati što bolji standard. Naša trajna obaveza je da stvorimo što bolje uslove rada, što sigurniju i moderniju opremu kako bi vama, rudarima, olakšali svakodnevni posao. Vi hrabri i časni komorati ste ponos Banovića i Bosne i Hercegovine – rekao je direktor Kudumović. Također je naveo da projekat izgradnje Termoelektrane nije zaustavljen.

- Naš cilj je da pokrenemo radove na projektu izgradnje Termobloka 1 u Banovićima, koji već tri godine iz nepoznatih razloga stagniraju. U ovom trenutku zajedno sa Resornim ministarstvom i Vladom FBiH radimo na zatvaranju preostale finansijske konstrukcije projekta i u tom smislu postoje određene aktivnosti – naveo je direktor Društva.

Na kraju je još jednom čestitao praznik svim rudarima, ali i svim ovogodišnjim dobitnicima nagrada „Zasluzni član Društva“ i nagrađenima za „Doprinos u radu“, uz želju da u narednim godinama njihov društveni status bude na višem nivou i da se u društvu više vrednuje i cijeni njihov rad.

Na svečanosti prisutnima se obratio i novoimenovani načelnik Banovića Bego Gutić, koji se osvrnuo na trenutno stanje u Rudniku u odnosu na prethodni period, te istakao da se u kratkom periodu od sedam mjeseci mnogo toga popravilo.



- Uprkos poteškoćama s kojim se Rudnik susretao, a koje su izazvane pandemijom korona virusa i nepovoljnim društvenim okolnostima, odnosno političkim neprilikama, koje su uticale na privredno kretanje RMU „Banovići“, nova uprava Društva uspjela je ispuniti planove i preduzeće dovesti do pozitivnog

finansijskog rezultata. Ono na čemu se aktivno radi jeste promjena koncepta i pokretanje izgradnje projekta Termoelektrane u Banovićima, za šta ključnu ulogu mora preuzeti Vlada FBiH i Resorno ministarstvo u saradnji sa lokalnom zajednicom – istakao je načelnik Gutić.

Na promjenu koncepta izgradnje Termoelektrane u Banovićima akcenat je stavio i premijer Federacije BiH Fadil Novalić, kao i na ovogodišnje probleme koji su zahvatili globalnu ekonomiju i koji su se u velikoj mjeri odrazili na energetski sektor.



- Pored toliko poteškoća možemo konstatovati da je godina na izmaku ipak bila uspješna u enegetskom, rudarskom i industrijskom sektoru. Kada je u pitanju rudnik „Banovići“ ispunjeni su svi proizvodni i finansijski planovi, te ostvarena dobit od oko dva miliona KM. Na tome trebamo čestitati onima od kojih proces kreće, onima koji kopaju ugali. Vlada FBiH i Resorno ministarstvo nastavit će proces modernizacije i humanizacije u rudnicima uvažavajući i cijeneći vašu posvećenost poslu i važnu ulogu koju imate u razvoju naše zemlje – rekao je premijer Novalić.

Njavio je i nastavak aktivnosti na realizaciji projekta izgradnje Termoelektrane, uz određene promjene starog modela koji do sada nije bio funkcionalan.

- Vlada FBiH nastavit će aktivnosti na izgradnji novih kapaciteta u Banovićima, ali to moramo na određeni način prepakovati. Stari vid projekta nije nikako mogao proći ni u vlasničkom, ni u bilo kojem drugom smislu. Svjedoci ste da ministar Džindić i ja u kratkom vremenskom roku dolazimo već drugi put u ovaj rudnik, a za to vrijeme nismo otišli ni u jedan drugi. Time šaljemo jasnu poruku da je Vlada FBiH partner RMU „Banovići“ i mislim da vam bolji partner od nas ne treba – završio je svoje obraćanje premijer Novalić.

Poslije obraćanja direktora Društva i gostiju uslijedila je dodjela priznanja „Zasluzni član Društva“ za sedam uposlenika rudničkih pogona. Plaketu i novčanu nagradu

u iznosu od 1.000 KM ove godine dobili su: Jusufović Hasan, Salihović Enes, Aličkanović Zahid – posthumno, Kudumović Damir, Derzić Nermin, Smajlović Samir i Čolić Mensud.



Rudnik „Banovići“ godinama unazad na Svečanoj akademiji dodjeljuje i priznanja svojim poslovnim saradnicima. Povelje o poslovno – tehničkoj saradnji ove godine dobili su načelnik općine Banovići Bego Gutić, ministar energije, rudarstva i industrije Nermin Džindić i premijer Vlade FBiH Fadil Novalić.



Sjednica je završena uz prigodan kulturno – zabavni program, nakon čega je upriličen koktel za goste u restoranu Radničkog doma.

Napominjemo da su ovogodišnji dobitnici priznanja "Doprinos u radu" svoje plakete i novčane nagrade u iznosu od 500 KM preuzeli dan ranije zbog sprečavanja širenja korona virusa.

U sklopu programa obilježavanja 21. decembra Dana rudara BiH održan je niz aktivnosti, započevši sa prijemom porodica šehida i poginulih radnika Rudnika, zatim ispraćaj penzionisanih radnika, dodjela priznanja "Doprinos u radu", a kruna proslave bio je spektakularni vatromet održan na Dan rudara.



## PUŠTEN U RAD DIO TRANSPORTNOG SISTEMA ZA ODVOZ JALOVINE

## NA DAN RUDARA IZVRŠEN PROBNI RAD

## NAJVEĆE POSLIJERATNE INVESTICIJE U RUDNIKU „BANOVIĆI“

Banovičkim rudarima veliki rudarski praznik ove godine počeo je na najbolji mogući način. Naime, u jutarnjim satima prije Centralne svečanosti u rad je pušten dio Transportnog sistema za odvoz jalovine na PK „Turija“. Višegodišnji projekat u koji je do sada uloženo preko 50 miliona KM povećat će proizvodnju, olakšati rad i ostvariti određene uštede u narednom periodu.

Dužine je četiri kilometra sa četiri presaipa i dva utovarna postrojenja, što će smanjiti broj dampera koji su do sada prevozili jalovinu, a vrijeme transportovanja otkrivke u krater PK „Čubrić“ višestruko ubrzati.

Novoj modernizaciji Rudnika i puštanju u rad jedinstvenog projekta u BiH, prisustvovao je i ministar energije, rudarstva i industrije Nermin Džindić, koji je transportni sistem zvanično pustio u rad.

- Ovo što vidite iza nas je postrojenje na kojem može svako da nam zavidi, projekat i jedno od rješenja koje je jedinstveno na prostoru bivše Jugoslavije. Nadam se da će nova Uprava koja je pokazala u prvih šest mjeseci dobre rezultate, prepoznati ovo ulaganje i da će u narednom periodu svakako pratiti signale koji dolaze iz Vlade Federacije BiH i Resornog ministarstva, te da ćemo tako od ovog Rudnika napraviti još bolji rudnik - naveo je Nermin Džindić, ministar energije, rudarstva i industrije FBiH.



Istaknuo je da pomenuti projekat banovičkom rudniku omogućava nastavak uspješne proizvodnje i da je Rudnik jedna baza, od kojeg umnogome zavisi općina Banovići, zbog čega je još veća senzibilnost prema dešavanjima koja su vezana za njega. Čestitao je Upravi, Nadzornom odboru i





svima onima koji su bili dio projekta, uz napomenu da je posebno sretan zbog činjenice da su u jednoj ovakvoj izgradnji učestvovali domaće kompanije.

Drobilično postrojenje sa dvije drobilice i kompletnim transportnim sistemom napraviti će velike promjene u procesu proizvodnje Rudnika. Prema riječima direktora Fadila Kudumovića doći će do povećanja kako na proizvodnji otkrivke tako i na proizvodnji uglja.

- Sa dosadašnjih 500 hiljada tona proizvedenih na površinskom kopu „Turija“ planirano je povećanje na milion tona separisanog uglja, a također planirano je i povećanje otkrivke sa 6 na 10 miliona kubnih jalovinske mase. Nakon eksploatacije površinskog kopa „Turija“ za narednih osam godina zamisao je da transportni sistem premjestimo na površinski kop „Grivice“. Tako da je investicija dugoročno isplativa – naveo je direktor Kudumović.

Radovi na cjelokupnom transportnom sistemu bit će kompletirani naredne godine kada je planirana instalacija još jednog odlagača kapaciteta 5,5 hiljada tona, a avans od 3,2 miliona KM već je uplaćen dobavljaču.

Nedostatak investicija, teški uslovi rada, neplaćeni doprinosi, kašnjenje plata, dugogodišnji su problemi većine rudnika u državi. No, za razliku od njih u

banovićkom rudniku situacija je znatno drugačija iz razloga što se, prije svega, mnogo ulaže u mehanizaciju.

Transportni sistem nije jedina investicija koja je ovih dana puštena u probni rad. Na Površinskoj eksploataciji uglja nedavno je u pogon stavljen i grejder CATERPILLAR vrijedan 1,5 miliona KM. Nabavljena mašina radit će na čišćenju trasa u okviru PK „Turija“, a po potrebi i na PK „Grivice“, te u velikoj mjeri popraviti uslove rada i olakšati proces proizvodnje.



LAUREATI 2020. GODINE

# ZA "DOPRINOS U RADU" NAGRAĐENO 58 UPOSLENIKA RUDNIKA



Rudnik „Banovići“ i ove godine dodijelio je priznanja za „Doprinos u radu“ za 58 uposlenika preduzeća. Iako je dosadašnja praksa bila da se ovaj tip nagrada dodjeljuje na Svečanoj sjednici uprave Društva, dodjela priznanja ovaj put održana je dan ranije, 17. decembra u restoranu Radničkog doma. Takva odluka donešena je zbog velikog broja nagrađenih radnika i poštivanja naredbi Kriznog štaba i nadležnih institucija.

Ceremoniju dodjele otvorio je direktor Rudnika Fadih Kudumović, koji je u obraćanju čestitao nagrađenima i naveo da se ove godine vodilo računa da istaknuti zaposlenici budu oni koji su to zaista zaslužili, kao i to da su nagrade podstrek za još bolji rad u budućnosti.

Akšamović Almir, Salihović Samir, Demirović Midhat, Mušanović Admir, Čerčić Sead, Terzić Suljo, Dobrnjić Mersad i Terzić Razija.

Nagrade iz pogona „Površinska eksploatacija uglja“ dobili su: Bojić Mirsad, Lapandić Bilal, Softić Sinan, Gegić Sead, Pozderović Redžo, Fočić Omer, Smajlović Amir, Džizić Vehid, Brčanić Ibro, Nurković Behader, Šehić Izet, Kahrmanović Jasmin, Grgić Milan, Ikanović Fadil, Kadrić Fehrat, Čerčić Enes, Lačić Avdo, Gutčić Hazim, Zukić Ramiz, Čerčić Denis i Bebaković Fatija.

Uručene su plakete i zaposlenicima „Separacije“, i to: Mešanović Šahim, Lugavić Emsad, Muminović Muhamed, Gutić Mirzet, Bešić Elmedin, Bošnjaković Adem, Derzić Fahrudin i Pirić Mensur.

Ovogodišnji dobitnici nagrada iz pogona „Željeznički transport“ su: Osmanović Samir, Krđžalić Zuhdija, Efendić Hazba, Avdihodžić Suad, Avdić Fikret i Ikanović Zakir.

Nagrađeni iz pogona „Standard i usluge“ su: Kahvedžić Sead i Memić Fikreta.



Ovogodišnji dobitnici priznanja iz pogona „Podzemna eksploatacija uglja“ su: Brigić Emir, Dedić Selmin, Bašić Semir, Terzić Jasmin, Husanović Sabaħudin, Softić Safer,





I na kraju, priznanja za doprinos u radu iz pogona „Direkcija“ dobili su: Berbić Ešefa, Sinanović Muzafer, Huremović Nihad, Hasić Šahbaz, Avdić Enes, Hasić Mehmed i Bekaković Tahir.



Među nagrađenima kojima su uručene plakete i na račun uplaćen novčani iznos od 500 KM našla se i Fikreta Memić, zaposlenica organizacione jedinice Standard i usluge. U ovom pogonu radi već 32 godine i posebno je zahvalna što je prepoznat njen trud i zalaganje kroz radni vijek. Nada se da će stanje u preduzeću iz godine u godinu biti sve bolje, a zaslužnih nagrada sve više.

Zahidija Krdžalić je mašinovoda u Željezničkom transportu već 38 godina. Zahvaljujući se na nagradama, rekao je da je ovo poseban momenat u njegovom životu jer je zaista velika čast biti istaknuti član Društva.

-Bilo je lijepih ali i burnih vremena, no nikada nisam razmišljao o promjeni posla. Kada bi ponovo birao posao, izabrao bi rad na željeznici. Zahvaljujem se upravi Društva, a posebno rukovodiocu svoje Organizacione jedinice koji je odlučio da upravo ja ove godine budem jedan od nagrađenih – navodi Krdžalić.



## SINDIKAT ZAPOSLENIKA RMU „BANOVIĆI“

# DODIJELJENA

# PRIZNANJA

# ZA 78 RADNIKA

Po prvi put ove godine povodom 21. decembra Dana rudara BiH Sindikat zaposlenika Rudnika upriličio je svečanu dodjelu priznanja zaslužnim radnicima i organizovao prigodan ručak u restoranu Radničkog doma.

Predsjednik Sindikata Nihad Huremović dodijelio je 78 plaketa za dugogodišnji istaknuti rad zaposlenicima Rudnika.

- Plakete su dodijeljene radnicima koji su istinski doprinijeli i preduzeću i Sindikatu. Međutim, mislim da nismo obuhvatili sve radnike koji su zaslužili ovakav vid priznanja, ali svakako ćemo nastojati da i naredne godine organizujemo dodjelu i odamo priznanje još većem broju radnika – kazao je predsjednik Sindikata Nihad Huremović.

Nadamo se da će ovakva praksa biti nastavljena i u budućnosti, kako bi pored godišnjih priznanja Uprave za „Zaslužne članove Društva“ i za „Doprinosu u radu“ sindikalna nagrada dodatno povećala broj nagrađenih radnika na kraju godine.



ISPRAČAJ PENZIONISANIH RADNIKA U 2020. GODINI

## ORGANIZOVANA PROSLAVA ZA 73 NOVA PENZIONERA RUDNIKA



Sredinom decembra u Radničkom domu organizovan je svečani ispračaj za 73 uposlenika rudnika „Banovići“ penzionisanih u 2020. godini. Upriličena svečanost i ovaj put protekla je u dobrom raspoloženju, druženju bivših rudara uz hranu i muziku. Slavilo se ali i rezimirao pređeni put od prvog radnog dana do danas, kada više nisu u ulozi radnika preduzeća.

Penzionisanim kolegama u ime menadžmenta Rudnika obratio se predsjednik Komisije za ispračaj penzionera Emir Rahmanović. Izrazio je zahvalnost za dugogodišnji doprinos u radu preduzeća uz želju da godine koje su pred njima provedu u zdravlju i onako kako su zaslužili poslije 40 godina rada u ovoj izuzetno teškoj djelatnosti. Penzionere je također ispred uprave Društva pozdravio i poželio sreću u daljem životu izvršni direktor za investicije i razvoj novih djelatnosti Damir Mrkonjić.

Kako tradicija nalaže, penzionisanim radnicima uručeni su pokloni, ručni sat sa posvetom i simbolični kip rudara, kao trajna uspomena na odradjeni radni vijek.

Bivši rudari izrazili su zahvalnost za dobru saradnju tokom proteklih godina, za izmirene obaveze prema njima i sigurnu penziju.

Redžo Tabaković skoro četiri decenije za život je zarađivao u jami „Omazići“.

„Prvih dana bilo je teško raditi, mrak, tjeskoba, ne znaš gdje ideš, hoćeš li izaći“ - prisjeća se Redžo svojih prvih radnih dana davne 1987. godine.



- Iz dana u dan uz komorate, uz starije kopače, starije radnike i njihovu podršku sve je išlo lakše. Tako da smo i mi mladi stekli neko iskustvo koje nam je kasnije postalo rutina. Odnosno poslije nekoliko godina sići u jamu je bilo kao nazvati „dobar dan“. Otići u jamu ili na izlet, svejedno. – pričao je u jednom dahu novopečeni penzioner.

Kaže da bi volio da svako bar jednom siđe u jamu i provode sa komoratima jedan dan, jer iako se bave djelatnošću u kojoj vrebaju brojne opasnosti rudari

svako druženje, pa i radni zadatak, započnu sa šalama i anegdotama, kako bi otjerali strah od onoga što se može desiti.

Među penzionisanim radnicima ove godine je i Ramo Mrkonjić koji je svoj radni vijek od 40 godina i 24 dana proveo u pogonu Željeznički transport rudnika „Banovići“. Počeo je raditi kao opravnik vozova, da bi kasnije dobio funkciju dispečera na vozovima za Termoelektranu „Tuzla“. Danas kao bivši radnik koji, kako kaže, nikada nije zakasnio na posao, ima poruku za one koji ostaju u Rudniku.



- Mi smo dosadašnjim radom trasirali put mladim kolegama. Svoj posao smo obavljali predano i profesionalno, a sada je na njima da tim putem

nastave, kako bi očuvali Rudnik koji nas sve hrani. Ne smijemo dozvoliti da se Rudniku desi ono što se posljednjih godina desilo nekadašnjim velikim preduzećima. Iz ove firme naposljetku odlazim kao zadovoljan radnik, sretan što sam doživio i ovu dionicu svoga života – kaže Mrkonji



Ako je neko zaslužio da uživa u penzionerskim danima onda su to zasigurno rudari i upravo zbog toga svake godine na prigodan način, uz najljepše želje iz ovog preduzeća budu ispraćeni u novu etapu života.

## PRIJEM ZA 76 PORODICA ŠEHIDA RUDNIKA „BANOVIĆI“

### ODATA POČAST ŠEHIDIMA I POGINULIM RUDARIMA RUDNIKA

Prijem porodica šehida i poginulih boraca Rudnika i ove godine bio je sastavni dio programa obilježavanja 21. decembra Dana rudara BiH. Iako je morao biti organizovan u specifičnim uslovima, menadžment Rudnika nije se mogao odreći moralnih obaveza prema 76 porodica onih koji su život dali u odbrani od agresije na našu zemlju. Godinama unazad program obilježavanja Dana rudara započinje sjećanjem na stradale komorate i već sada je tradicionalna aktivnost u rudniku „Banovići“.

Prijem je počeo okupljanjem porodica ispred Centralnog spomen obilježja, polaganjem cvijeća i odavanjem dužne počasti poginulim borcima.



Pristupima se ispred Uprave Rudnika ovaj put obratio direktor Društva Fadil Kudumović. Zahvalivši se na odazivu, istakao je da se prijem organizuje kako bi se i na ovaj način pokazala briga i pažnja prema porodicama šehida, ali i način da se održi kontakt sa njima.

Kao i prethodnih godina i ovaj put uplaćena su simbolična novčana sredstva i organizovan ručak u restoranu Radničkog doma.



## PROIZVODNJA UGLJA I OTKRIVKE

# ISPUNJENI OVOGODIŠNJI PLANOVI NA PROIZVODNJI UGLJA I OTKRIVKE

Iako po mnogo čemu specifična 2020. godina u rudniku „Banovići“ biće ispraćena po oprobanoj receptu, u znaku dostignutih zadatih ciljeva na proizvodnji uglja i otkrivke. Ni otežani radni uslovi uzrokovani trenutnom epidemiološkom situacijom nisu ugrozili produktivnost rada na proizvodnim pogonima.

Za 11 mjeseci ove godine ukupno je proizvedeno i na tržište plasirano 1.444.632 tona separisanog uglja, što iznosi oko 93,30% cjelokupne planirane proizvodnje. Većih problema nije bilo ni kada je u pitanju realizacija otkrivke, što pokazuju ostvareni iznadplanski rezultati u iznosu od 102,32 %, odnosno u pomenutom periodu realizovano je 11.100.030 metara kubnih čvrste mase.

Tokom mjeseca decembra planirano je da se proizvede 151.660 tona separisanog uglja i realizuje 899.990 metara kubnih čvrste mase, što su realne procjene, obzirom da je za 24 dana mjeseca decembra proizvedeno 105.425 tona uglja i realizovano 840.710 m<sup>3</sup> otkrivke.

Da bi se u rudnicima uspješno postigla planirana proizvodnja, odnosno realizovala osnovna djelatnost, neophodno je da sistem pomoćne mehanizacije pruža visoku pouzdanost i sigurnost, te da ostvaruje što veće vremensko i kapacitetno iskorištenje. Poučeni zatečenim lošim stanjem pomoćne mahanizacije, novo rukovodstvo krenulo je sa aktivnijim i ažurnijim praćenjem i rješavanjem stanja, intenzivirajući radove na održavanju. To je u konačnici pokazalo dobre



efekte i dovelo do pozitivnih finansijsko-proizvodnih rezultata.

Kada su u pitanju ovogodišnji finansijski proračuni utvrđeno je da su ukupni prihodi za jedanaest mjeseci tekuće godine bili oko 1,5 miliona veći u odnosu na ukupne rashode, odonso ukupni prihodi iznosili su 133.637.995,65 KM, dok su se ukupni rashodi kretali oko 132.077.000 KM. Planom je predviđeno da završetkom mjeseca decembra ukupni prihodi budu povećani za oko 13,5 miliona KM, a ukupni rashodi za 13,2 miliona KM, što će se najbolje ogledati kroz ostvarenu finansijsku dobit koja će u konačnici iznosti oko 2 miliona KM.



RMU „BANOVIĆI“ d.d. BANOVIĆI PROIZVODNO – FINANSIJSKE REZULTATE  
PODIGAO NA VIŠI NIVO

## I PORED TURBULENTNOG PERIODA OSTVARENI PROIZVODNO – FINANSIJSKI REZULTATI ZNATNO BOLJI U ODNOSU NA PROŠLU GODINU

Godina na izmaku u rudniku „Banovići“ prema preliminarnim poslovno – finansijskim izvještajima završit će ispunjenjem plana na proizvodnji uglja i prebačajem na realizaciji otkrivke, što će se pozitivno odraziti i na krajnji finansijski rezultat poslovanja.

Ukupna proizvodnja do kraja godine iznosit će oko 1.600.000 tona separisanog uglja, što procentualno iznosi oko 94%, dok je prethodne godine proizvodnja uglja bila na nivou od 92,08%. Pomak na proizvodnji u odnosu na prošlu godinu utoliko je značajniji uzme li se u obzir da je ova godina bila turbulentna i obilježena kompleksnim uslovima rada izazvanih pandemijom virusa COVID-19.

Međutim, ono što je ključno za preduzeće koje se bavi ovom djelatnošću jeste realizacija otkrivke, koja je velikim dijelom godine prelazila preko plana, što se u konačnici odrazilo i na kumulativnom nivou, gdje se očekuje ostvarenje otkrivke od 12.500.000 metara kubnih čvrste mase, odnosno 102,14% od plana. Uporedimo li ove rezultate sa prethodnom godinom vidljiv je značajan napredak, obzirom da je 2019. godina završila sa 88,68% ostvarenja na otkrivci.

Finansijsku godinu rudnici „Banovići“ završit će sa pozitivnim rezultatom u iznosu od oko 2 miliona KM. Iako su ovo rezultati vrijedni pomena oni ipak nisu stvarni odraz poslovanja u protekloj godini, u kojoj se desio niz neplaniranih rashoda. Naime, od mjeseca januara tekuće godine plate zaposlenika na osnovu Kolektivnog ugovora povećane su 8%, dok je od marta mjeseca visina toplog obroka sa 10 KM povećana na 14 KM. Za te potrebe na konto rashoda proknjiženo je oko 10 miliona

KM, koji nisu predviđeni Godišnjim planom poslovanja preduzeća. Jednostavnom računom, vođeni planom poslovanja, bez pomenutih opterećenja rudnik „Banovići“ ovu godinu završio bi sa dobiti od skoro 11 miliona KM.

Zahvaljujući adekvatnoj strategiji rada i racionalnom provođenju javnih nabavki postignuto je balansiranje i smanjenje troškova uz istovremeno povećanje proizvodnje uglja i otkrivke, a najveće uštede zabilježene su na troškovima nafte u iznosu od oko 3 miliona KM. Pomenute uštede, povećana prodaja i bolji kvalitet uglja ostavili su prostora za nabavku neophodne pomoćne mehanizacije iz vlastitih sredstava. Tako je nedavno na Površinsku eksploataciju uglja pristigao novi grejder vrijedan 1,5 miliona KM. U izgradnju Transportnog sistema za odvoz jalovine u toku godine investirano je preko 5,5 miliona KM. Ukupna investiranja za ovu godinu, računajući i ona pokrenuta u 2019. godini, iznose oko 60 miliona KM.

U cilju poboljšanja poslovnog ambijenta i podizanja rezultata na viši nivo u narednoj godini planirane su značajne investicije. Raspisan je javni tender za nabavku četiri buldozera, drobilicu na Separaciji, dizel lokomotivu i niz drugih investicija. Nabavka dva damper kamiona i bager gusjeničar, također su planirani Trogodišnjim planom poslovanja preduzeća.

I pored svega navedenog važno je napomenuti da je rudnik „Banovići“ jedini rudnik koji plaća koncesije državi, izmiruje sve obaveze, doprinosi i poreze prema državi, dobavljačima i radnicima.

## PODZEMNA EKSPLOATACIJA UGLJA

# SREDINOM NOVEMBRA POČELA EKSPLOATACIJA UGLJA IZ NOVOG OTKOPNOG POLJA



Krajem mjeseca septembra završena je eksploatacija jamskog uglja iz otkopnog polja Z<sub>1</sub>, a već 6. oktobra krenulo se sa demontažom opreme i procesom prebacivanja kompleksa mehanizovanog čela u novo otkopno polje Z<sub>2</sub>.

Samom procesu prebacivanja opreme prethodile su rudarske pripreme radnje za osiguravanje čela i stvaranje uslova za izvlačenje opreme. Ovo je bilo jedno od najzahtjevnijih prebacivanja opreme, obzirom da su se 34 sekcije morale demontirati i izvući vani, što je zbog specifičnosti situacije u manjoj mjeri usporilo proces. Razlog izvlačenja dijela opreme je mala širina novog otkopnog polja, koju su diktirali rudarski i geološki uslovi. Širina otkopnog polja Z<sub>2</sub> je oko 55 m i u njemu je montirano 36 sekcija, dok su sva ranija otkopna polja uglavnom bila oko 100 m širine. Međutim, radnici Podzemne eksploatacije uglja bez ijedne

teže povrede posao su obavili u planiranom vremenskom roku i već 13. novembra krenuli sa otkopavanjem otkopnog polja Z<sub>2</sub>. Nakon toga uslijedio je period ispitivanja kompatibilnosti opreme mehanizovanog čela i linije transporta. Obzirom da se radi o jako dugoj liniji transporta, sa mnogo transporterata, bilo je važno da se prije punog opterećenja sve detaljno provjeri i iskontroliše, kako ne bi došlo do neplaniranih zastoja. Da su poslovi obavljeni dobro dokaz su i konačne brojke na proizvodnji jamskog uglja zaključne sa mjesecom decembrom. Iz novog otkopnog polja na tržište do sada je plasirano 51.891,5 tona separisanog uglja.

Predviđanja su da će slijedeće prebacivanje opreme biti tek sredinom naredne godine u otkopno polje Z<sub>2-2</sub> koje će biti duže i šire od trenutnog otkopnog polja, odnosno širina polja bit će 100 m.

Ono što je bitno spomenuti je činjenica da je kompleks širokog mehanizovanog čela nabavljen 2013. godine i da se radi o gabaritnim uređajima, ali da je očuvanost i funkcionalnost opreme na zavidnom nivou prije svega zbog adekvatnog servisiranja od strane radnika Rudnika. Na samom početku radnici Rudnika nisu imali veliko predznanje o ovoj vrsti mehanizacije, ali danas, nakon sedam godina rada, stekli su veliko iskustvo što se pokazalo i u ovoj situaciji.

Rukovodstvo pogona navodi da se na tržište dnevno plasira oko 1.500 tona jamskog uglja, što je ujedno pomoglo i ostvarenju godišnjih planova na nivou Rudnika.





## ZADRŽAN TREND VISOKOG NIVOVA PROIZVODNJE UGLJA I OTKRIVKE

**POVRŠINSKI KOPOVI GODINU ZAVRŠAVAJU SA IZNADPLANSKIM REZULTATIMA**

Planom predviđena ukupna proizvodnja uglja na površinskim kopovima od 1.129.934,2 tona za nepunih dvanaest mjeseci tekuće godine prebačena je za 4.633,2 tona rovnog uglja. Prebačaj je zabilježen i na godišnjoj realizaciji otkrивke sa 3,5%, odnosno realizovano je 12.198.431 metara kubnih jalovinske mase.

Zasluge za pomenute rezultate pripadaju svim uposlenicima Površinske eksploatacije uglja koji su tokom cijele godine zajedničkim djelovanjem doprinijeli dobrom proizvodnom stanju na oba površinska kopa. Spremnost na suradnju posebno su pokazali u mjesecu oktobru kada je u jami vršeno prebacivanje širokog mehanizovanog čela u novo otkopno polje, zbog čega je bila upotpunosti zaustavljena proizvodnja jamskog uglja. Iako su površinski kopovi bili nosioci cjelokupne proizvodnje i pomenutom mjesecu, isporuka uglja prema kupcima išla je po utvrđenom planu.

Planovi su sustignuti i prebačeni zahvaljujući ispravnosti pomoćne mehanizacije, na kojoj se konstantno radilo tokom cijele godine. Posljednjih mjeseci planiranom dinamikom aktivno se radilo na održavanju damper kamiona i prateće pomoćne mehanizacije. Vršeni su remont i zamjene motora na damper kamionima, a ista praksa provoditi će se i u narednom periodu kako bi se osposobili i kamioni koji su u dužem zastoju. Redovni pregledi i sanacija pomoćne mehanizacije zahtjevala je posebno angažovanje radnika, koji su na vrijeme otklanjali kvarove i vršili periodične preglede mehanizacije. Izvršeni su generalni remont na grederu 2 i buldozeru Komatsu 1, a u narednom periodu planirana je popravka još dva buldozera i jednog gredera.

Radilo se i na osposobljavanju bagera kašikara EKG od kojih je EKG 81 – 1 pušten u rad, dok se za EKG 81 – 2 čeka isporuka rezervnih dijelova. Za potrebe osposobljavanja pomenutih bagera utrošeno je oko milion KM. Određene popravke vršene su i na bageru Terex RH – 1 gdje je urađen remont reduktora pumpe, dvije glavne pumpe i pumpe kružnog kretanja.

U cilju povećane produktivnosti rada provedena su i određena investiciona ulaganja, pa je tako nedavno u rad pušten viljuškar Hxster nosivosti 12 tona, a potpisan je i Ugovor za nabavku nove cisterne za gorivo, koja će uveliko olakšati snabdijevanje pomoćne mehanizacije sa dizel gorivom.

Paralelno sa proizvodnjom uglja i otkrивke intenzivno se radilo i na izgradnji transportnog sistema na površinskom kopu „Turija“, koji je na Dan rudara i zvanično pušten u rad. Drobilnično postrojenje 2 je kompletno, dok su radovi na drobilničnom postrojenju 1 realizovani sa 80%.

Po svemu navedenom može se zaključiti da je proizvodna godina na kopovima protekla bez značajnijih problema, uporedo se proizvodilo i radilo na sistemu održavanja pomoćne mehanizacije, što se na kraju pokazalo vrlo učinkovito.



## ČLAN KOLEGIJA PREDSTAVNIČKOG DOMA PARLAMENTARNE SKUPŠTINE BIH DR. DENIS ZVIZDIĆ U RADNOJ POSJETI RUDNIKU "BANOVIĆI"

# "BANOVIĆKI RUDNIK NAJZNAČAJNIJA JE KOMPANIJA NA PODRUČJU OPĆINE, ALI I STRATEŠKI VAŽNA KOMPANIJA ZA ENERGETSKI SISTEM FEDERACIJE BiH"



Nedavnom posjetom rudniku "Banovići" punu podršku razvoju preduzeća dao je član Kolegija Predstavničkog doma Parlamentarne skupštine BiH dr. Denis Zvizdić. Sastanak sa upravom Društva održan je u prostorijama Direkcije rudnika, gdje su u kraćem obliku predstavljene dosadašnji rezultati, ali i dalji planovi u razvoju preduzeća.

Po završetku sastanka u izjavama za medije Zvizdić je rekao kako je Rudnik najznačajnija kompanija na području općine Banovići, ali i nadasve važna strateška kompanija za energetski sistem Federacije BiH.

- U razgovoru sa upravom Rudnika može se zaključiti da su pokazali ozbiljne namjere i ostvarili određene pozitivne rezultate kojima su uspjeli da očuvaju nivo dostignute proizvodnje, iako su došli na čelo preduzeća prije samo nekoliko mjeseci. Planirana su i nova upošljavanja od oko 120 radnika, što je u ovom nezahvalnom periodu od posebnog značaja. Dakle, njihov dosadašnji rad pokazuje da imaju vrlo dobru viziju, htjenje i ideju da se očuva dostignuti nivo proizvodnje, ali i utemeljene realne ideje o daljem širenju preduzeća - rekao je dr. Denis Zvizdić.



**Direktor Kudumović: gospodin Zvizdić spreman je pomoći Rudniku u daljnjim pregovorima sa Vladom FBiH i JP "Elektroprivredom BiH" o opstanku i razvoju preduzeća**

Najaktuelnije teme pomenutih sastanka prokomentarisao je i direktor Rudnika Fadi Kudumović, navodeći da su kroz razgovor sumirali trenutno stanje u Rudniku i pokušali napraviti određene smjernice za dalji razvoj.

- Dobili smo punu podršku gospodina Zvizdića, ali i pomoć u daljnjim pregovorima sa Vladom FBiH i JP "Elektroprivredom BiH" o opstanku i razvoju preduzeća, naravno u skladu sa njegovim mogućnostima. Također, tema razgovora bila je i realizacija projekta izgradnje termoelektrane u Banovićima, gdje smo svi istog mišljenja da se u konačnici sva koncepcija Rudnika zasniva na izgradnji termobloka u Banovićima u cilju sigurnog plasmana banovičkog uglja u budućem periodu - naveo je direktor Kudumović.

